

天真閣集

天真閣集卷七

詩七

昭文 孫原湘 子瀟

雜詩

一語不合意
帟帷自胡越
兩心果相照
萬里同秋月
握手出肺肝
副之珊瑚玦
但覺意氣雄
豈解相慕悅
物理感自然
不見磁引鐵

涼蟾入虛室
照見人影孤
我有素心友
遠在西北隅
寄聲與秋風
道我相招呼
長隨一片月
抱影還故都
願借逕寸光
照彼萬里途
月高不可間
月落空啼烏

客去獨坐

老樹禿無葉
秋聲何處生
忽如頭白士
猶作不平鳴
月落人初去
風高聽倍驚
翻嫌天不雨
無計爲畱行

渡江

小別金焦又五年一雙青眼故依然
鳥盤絕頂聲俱上帆到中流影在先
無地劃開吳楚界有天圍住水雲邊
飄然已作揚州夢不用腰纏十萬錢

清江逢故人

與子十年別音書萬里招津亭一相遇
木葉正蕭蕭便下淮南去無由停短橈
惟餘兩行淚和雨落江潮

冒雨夜達青駝寺

獨客天涯已斷魂滿身風雨又黃昏
雙輪一徑與石鬪萬壑衆流隨馬奔
燐火有聲穿古墓溼烟無力脫遙村
茅簷兒女團圞坐安上篝燈早閉門

鄧城

夢猶馬背續馬足已先停沂水雙瞻碧蒙山一髮青問官徵舊
史傾蓋說孤亭孔望峯頭望長風瀉海溟

禪林

紅葉紫霞蒸清溪白石澄遠山幽似客孤樹瘦于僧野色當秋
迴鄉心入莫增禪林好風景記得夢遊曾

車行晚晴

馬頭風細鐸聲圓雨過諸山晚翠妍老屋偏支秋水外娛晴纔
漏斷雲邊霜楓紅繡羣羊地烟樹青兜一雁天村落寒花三四
簇天涯愁殺杜樊川

黎城

松門嶺頭新月生松門嶺下遊人行綠杉暗處鷓鴣宿驚起忽
啼三五聲

順德懷古

沙邱之臺秋復秋廣阿之澤流不流說秦空勞季子舌拔趙竟
斬陳餘頭井陘道上左車計柏人城中趙午謀古今機事只如
此柳溪笑殺閒眠鷗

望都旅夜

雲起望都山雨灑紫荆嶺孤館峭寒生如坐深山境美人期不
來迢迢夜方丙燈花落復開風動翦刀冷愁思夢無由湘簾蕩
人影雞聲喔喔催衣裳不暇整五更出郭門濃露滴衣領

宿長新店夢回京師同淵如子和

茫茫人海少閒身纔出京華便散人翻爲相思忘不得又勞秋
夢入紅塵

旅夜

任有疏簾隔尖風冷透膚不知秋氣逼祇覺客心孤寒月光全
縮殘燈欲燄蘇雁聲天際緊僕夢正饑餬

曉發

霜天漠漠淡於波月色連天一片和幽樹瘦疑秋士立遠山平
似曉烟拖夢殘猶苦雞聲喚愁重難勝馬力駝十載征衫青未
脫祇餘燕市酒痕多

樂城

小屋含愁坐疏簾寒氣侵酒醒知月上人靜覺秋深落葉頻年
況殘燈此夜心滯沲河水落鳴咽和霜碁

高郵

不及送殘月出門朝日升天青羣樹合山白亂雲蒸人籟靜于
水客心孤似僧西來風力勁秋澗欲成冰

趙店

羣峯到此坦天就一孤邨人外秋聲碎楓邊夕照溫石生山腹
子雞抱樹頭孫比屋多豐稔桑麻細與論

武安縣

到境諸峯合蒼蒼翠不分曉天含卵色寒石裂冰紋縣小裏紅
樹城開穿白雲當關能戰守最憶武安君

山行

紅日如盤挂碧林茅簷兒女弄雙鍼朝來飢色黃如菜五色山
花兩鬢簪

上章闡茂

得子和故鄉書

知我思君切書來報已歸欣言慈母健悵道故人違遠水礙春

樹亂雲涵夕暉栖遲此何意瑤瑟冷清徽

觀弈

看是平平路中藏勢嶮巖寸心籌算密尺地運謀奇虛實防人
誘高低竊自知點頭應得計斂手定生疑恃勝恆多敗貪功易
受欺被圍憂莫解破敵喜難支落子神頭鎮隨方鬼陣移拙行
圖適性費日苦凝思鉅鹿爭雄日昆陽決戰時推枰同一笑黑
白漫相持

重別上黨

昔從親宦遊三年郡齋仕朝看百穀雲莫看五龍樹飄然賦歸
歟山川屢回顧迢迢松門嶺烟霞夢中赴今歲隨春來孤蹤偶
停駐春盡趣我行天平太勿遽雲光秀依然樹色翠如故異地
豈足戀吾親舊遊處灑涕出北門塵容寫憂慮落日銜空山踟

躑倦行路

太行回車行

太行之山高巍巍青天壓頂勢欲摧密林深莽伏魑魅幽崖邃
壑含風雷白日之光不可到但覺猿啼虎嘯暝色催壯士到此
顏色慘殺人之心死爲灰馬蹄不能駐車輪不能推中心搖搖
似畏而非畏似哀而非哀天生李將軍自是飛將才一戰不得
當五石空能開黃金散盡可復來青春一去不復回或言神仙
在蓬萊勸我汗漫遊九垓登高望海水一杯海中豈有金銀臺
不如歸去南山隈烏虜不如歸去南山隈山中自有輪囷鬱律
無用之長材

任城太白酒樓歌

乾坤茫茫此酒樓酒星搖搖樓上頭謫仙人去我來此闌干一

憑生百愁古來人人杯在手古來幾人知飲酒當時已苦無酒
徒呼取青天月爲友欲飲李白酒先識李白人醒眼看人欲羞
死不如一醉全其真長安少年遊俠郎相逢不言各盡觴世人
不識李太白但言市頭酣嬉一酒狂我欲樓中置兩位三閭大
夫來作配同是騎鯨水上仙千古一醒與一醉要知醒者亦醉
醉亦醒白也詩卽離騷經三閭早識酒中意悔不湘江浮綠醺
我生千一百年後夢見長星飛入口覺來酒思如涌泉走上樓
頭看北斗鸕鷀之杓鸚鵡杯高呼太白不下來風吹黃河作酒
色愁思如何酒消得

歸舟

我船昨日渡黃河片帆直下如平坡同行客子各快意爲言此
樂應難繼朝來一葉臨江泊白浪高于潤州郭舟人惕息不敢

行強之始作呶啞聲中流橫吹鐵笛和一聲直逼涼雲破颶風
忽轉爲輕颿鯨波化作青琉璃鮫人河伯各聽命貝闕龍堂開
寶鏡鏡中打槳雙飛鳧船頭唱歌船尾呼人生驚喜不可測莫
信前途俱坦適回首黑雲風又起我船只行十八里

哭李

仝

仝本雲間故家子年十二隨余先大夫守上邵命典
書記尋以親老告退西藏之計仝聞涕泣如雨未幾
遂病宛轉衾褥間日課詩數首卒以瘵死

十五年隨侍尋常亦可哀况能懷主德更有出羣才每負錦囊
去同探梅萼開蹇驢今得句淒絕付誰來

甚欲問遺橐還愁觸我悲常懷親在日曾譽汝能詩萬里勞臣
績三年故主思從今翻妬汝泉路得追隨

重光大淵獻

過亡兒阿安墓

隔歲不經墓松楸似汝長九原應釋恨百歲亦終亡大父丹心炳勞臣白骨香弱菟風雨夜好住阿翁旁

采桑歌

日出東南角倉庚上樹鳴攜筐吾敢緩已恐有人行

省緣長者蓮池清楚圖蕭百堂屬賦

蕭郎示我長者像命我讚歎須合掌平生不解作禪語謂若縣蠻鳥弄吭欣然開卷爲題詩下筆如搔隔韡癢但見澄潭水一區中有扶藁若在盍文翰錦翼不識名蓮葉東西戲來往蕭郎軒渠笑我陋凡夫讀書見未廣此水名爲寶蓮池其中寶蓮長十丈迦陵頻伽微妙音鳥爲供奉花供養我聞歡喜生信心嗅

之無香聽無響三間破屋老西風公然竟作天際想我鄉湖上
荷華開湖尾湖頭蕩蘭漿鷺鷥鷓鴣如雪來欸乃一聲山月上
此時意境如凌虛不復知身在天壤何須作佛生西天卽此脩
然脫塵網悔初居士百堂東坡禪見我此詩應擊賞舌本瀾翻
作寶池蓮花盡從舌底長大家燒卻乾矢橛一以遊戲爲宗仰
省緣長者曰咄咄當頭打下一拄杖

絕食操

王貞字慕貞太倉馮策勳之聘婦勳卒貞泣血不食
矢奉母以終守十三年矣母死世父香復許字某女
聞自縊救之復甦某復與香謀娶女遂托疾不食而
死余聞其義撫琴爲之操曰

爲兒語伯兒不復死兒今有疾疾何爲耶僵不食問之醫者醫

者不能識兒腹飽仁義安用黍與稷兒性自薑桂安用礪與朮
母許兒守義伯所習知之伯欲兒更行痛母未及知欲兒更行
勿苟且兒去問母黃泉下

殷母張孺人節孝操

皇天不仁奪我夫兮誰爲反哺飼君姑兮上堂熙熙姑色怡兮
忘其身之無兒兮下堂申申姑履輕兮不知其目之盲兮非忘
其盲兮惟婦之爲明兮非忘其嗣兮惟婦之爲子兮

春人曲

春人出簾春有聲蝴蝶飛上釵頭迎花枝揚揚柳宛宛一齊都
向闌邊傾大婢焚香篆雙縷小婢折花裊初舉東風吹響過牆
頭半雜鶯歌半人語人語喁喁不可傳春情只在鏡臺前新睂
如月初三夜新月如人十五年春光一瞥如飛絮春人靜守紅

窗莫翦取朝雲作綵幡如何遮得斜陽住

汝南曲

心青先生鐵石心美人何事來花陰願煩南史淋漓筆爲作西
家宛轉吟沈吟欲語還羞迴出口都成蘭氣息未從舌底露愁
端已向睂間傳恨色自言門第列簪纓阿父黌宮舊有名公瑾
雅人能顧曲彥倫高蹈更遺榮可憐兩鬢蕭蕭白生女如兒倍
珍惜十三教誦比紅詩二八工挑縷金烏珍重金屏射爵遲偏
教楚客繫紅絲桃華未待冰開日椿樹先凋露結時銀漢迢迢
春漏永舊家門巷烏啼冷剛逢月上柳梢頭恰來人弄花枝影
卻下晶簾不敢看風欺銀燭護持難衣襟百結空持帶釵股雙
飛忽挂冠明珠頓減千金價一縷心香悔中夜阿母教移鸞鳳
巢比鄰潛結鴛鴦社有客豪奢脯擘麟當筵一擲銷千緡原知

白璧終爲玷無奈黃金易誤人從此朝懽莫不足鍼箱倦繡侬
人服酒後高呼五木盧花前低按雙聲曲小字驚傳滿縣城出
山泉豈入山清鏡歛願返溫家聘珠斛重邀石尉盟陸賈金多
顏實寢李郎情薄猜尤甚鄴下雖營銅雀臺宣城自抱神雞枕
曾記芳筵七夕期就中張緒最風姿盃深屢勸傳柑酒坐遠難
邀卻扇詩秋風秋雨挑鐙聽靜掩牕紗人欲病淚點宵融翡翠
衾愁顏曉滿芙蓉鏡花縱嬌饒月縱妍佗時飄泊豈堪憐真孃
骨葬誰家土蘇小竟歸何處天呼來畫手長康妙君未眼花儂
正少對面相邀屑玉譚回頭手握圓冰照刻意凝思兩日成遲
遲下筆點雙睛若教屢喚真應下便不能言已似生圖成自洗
椒觴莫畫裏朱顏莫輕變佗日身隨柳絮飛有人尙識梨花面

長歌贈胡山人

補

卽題其長松圖

上無青天松作蓋下無尺土松根代軒然獨立古丈夫身與松
直非松扶以手指心心似鏡活人壽人惟我柄世人不能無死
生此手能使往者留其形世人不能無苑槁此手能使少者形
不老陰陽爲炭精氣銅陶鑄面目百不同君今鑪錘自在手筆
與造化爭其功隨珠照乘無迴照翻倩他人寫君貌良醫從古
不自醫教子由來易而教我今更欲掣君肘莫漫逢人施妙手
眼中豈易得佳人世上海嘗別妍醜城南市頭酒涌泉不如逕
買一醉眠屠沽未必無奇士誰是商巖屨裏賢

中秋對月憶阿安舊事

入戶風淒淒當牕月皎皎悠悠對空庭戚戚傷懷抱丁未中秋
夕骨肉紛圍繞三郎初讀書故事解答翦紙作兩層如鏡圓
而小中畫一常儀隱約在雲表上題重輪宮下署臣剛造黏上

雪色屏舉家稱絕倒更索端靜生名仲紙筆如埽輒題六十字

疑義不可曉

兒初讀說文爾雅輒喜作詩裁掌大小本作箋補

消溽濯齊致玢瑕琢琥琉璃摩膏輻輳屏氛翳曜弱告休蘇
舊龜龍舌腭反蝦蟇齧金飽吐氣青林間結璘洞綺閣深魁曲
溟鯢詞旨踏駿中間有奇語蝦蟇齧金飽詩成索我改拂之容

不解何謂也

色愀語以明年秋當爲汝易橐懽喜跳躍去重來覓梨聚前事
猶宛然聰明已枯槁空餘遺挂存對我聲悄悄月光照壁上玉
貌仍姣好此時孤墳中黽鼃方竄擾毒手遭庸醫非關命當天
汝父昧藥理終天怒如擣

大兒

文杓

見余前詩愴然有憶弟之作示和二首

三年荒卻中秋宴豈意今宵更舉盃收淚甫能思往事生兒端
怕賦奇才吟成璧月真飛去記得金環定再來廚角封題遺墨
在蟲絲蛛網忍重開

四子成行失兩人就中最秀最先淪始知兒輩宜豚犬不合人間有鳳麟漫擬西河投杖拜差羸東野束柴身亂思紆憤都無益還向元夫問宿因

筠樵北行同子山子和頊儒凌客叔野攜酒餞飲

有錢不飲不如窠有花不看不如瞽階下平堆絳蠟膏盤中細切紅虬脯酒酣慷慨發高歌人世能無別離苦丈夫七尺空昂藏俯仰兩問竟無補十年磨劒未屠龍五石開弓不射虎寂寞文章付草萊蕭條生計持門戶珊瑚歲歲減容光孔翠時時惜毛羽兒女情教白髮生英雄力貴青年努十月燕臺雪作花秦姬彈箏趙姬舞君去應須解鷓鴣人前莫謾誇鷓鴣更無駿骨委泥沙恐有奇才隱屠酤此會團圓豈偶然故人喜得今宵聚且將瘦骨傲東籬莫便離心黯南浦興酣已使五嶽搖拇戰猶

堪餘勇買千杯不醉勝長鯨四韻無成罰童殺西風滿地落葉
深有酒且澆故鄉土

筠樵索余詩彙檢得少作一卷贈之

海內論詩幾輩同知音解惜纍餘桐西風驢背衝寒去吟向蕭
蕭落葉中

登高

漢水不西去夕陽無復東紅塵十丈裏青史幾行中巖壑徒陳
迹登臨尙古風吾曹吟嘯處星斗動虛空

美人

我有愁心在何緣醉汝旁不如明鏡好長對美人妝
寄羅衣空復香因之化秋月終古照蘭房

山中

插天千尺壁上有秦時松一夜西風老拏空欲化龍乍看白雲起已作青芙蓉不是梅花候無人此倚筇

檢閱舊橐戲題

未知肝膽向誰傾一尺春波一尺情誤使才名爲俗重生來軀骨似仙輕終慙李白清狂思猶帶秦青激楚聲方欲懺除文字習虹光偏盪斗牛明

夢中作

采得靈芝壽玉皇罡風吹動紫霞裳諸天眷屬齊聞得道是人間草木香

詠顧裕愍公事同吳竹橋丈作

魏闢竊權趙高比朝廷竟有兩天子先生身未列諫垣代草疏

章

王莊毅刺沈確疏語侵客氏當時謂出公手

深切齒南昌

劉一

去國幾中傷蒨城

王罷職善類亡交關肯緊莫効力乾兒義子增披猖文言小吏
實禍水百難多從借端起移宮牽合及封疆正人一網打盡矣
議能議勞實愛才証以弼獄冤可哀六人適成芝六辦襖那瑞
邪殊怪哉五人既斃鎮撫獄先生對簿刑尤酷此氣寧爲比部
撓此身羞被閹人僂借使自証証五人九原應玷清流目慷慨
投繯大義完鷹犬何從肆其噬不入東林用意深舉朝誰識賈
彪心本非同事偏同難君子惟知大節臨羣黨之分係乎此何
事紛紛門戶啟他年力薦楊維垣卻是東林黨魁耳

紫姑神曲

新年兒女樂事濃紅燈夜點清茶供瑤鼎纔焚瓣香篆玉盤乍
啟凝塵封靈機忽重似鐵筆作圈漸大如金鍾須臾磨上蟻旋
急分明雪裏鴻鴈蹤揣摩著眼認帝虎運掉如意猶神龍惜難

雙鉤付刊勒幸許兩腕聊從容清思妙理語未道奇字奧句文則從丰容隔世已杳眇環佩卽席疑丁冬當今

堯舜御六合悉屏魑魅如四凶吞刀吐火法所禁安鑪置鼎月誰鎔民知豐年足娛樂俗循故事真愚憊鬼神本屬意境造游戲亦以禮貌恭偶乘生氣一鼓動遂假人手爲衡縱事人未能況事鬼學仙不如還學農蠶家占驗聊復爾豬鬬迎送誰其逢明朝舉室發大笑糞箕尙插花蓬鬆

朱烈女哀詞

烈女新市人幼許字秦聞訃誓以死守有求婚者家人欲奪其志遂縊而死

聖人不強人所難女子豈解大節完壻喪弗娶許改適壻死服斬弔則還與爲勉強中道悔寧順父命求其安苟能凜然持大

義聖人豈不許其志惜曾子問不復及致令後儒滋異議士人
讀書希聖賢功名內熱氣節捐視顏事仇管子學世脩降表李
氏傳高官厚爵且如此未食君祿宜其然何況閨門弱女子生
眼不識經與史利誘勢奪百不回竟得從容就義死始謂豈易
得一人繼璜涇馮璜涇王貞今又秦同時正氣既不孤異世大節猶
如新或言二女金已過若論中庸莫附和西山曾未立商朝夫
子稱仁賞其餓

桃原澗觀瀑行

山中一夜飛雪響朝來桃花紅滿山白雲乍起幽谷底轉眼已
失青螺鬟夜夢芙蓉不可攀白龍倒挂龍尾彎松風時來忽吹
斷龍涎細噴桃花斑先生遇之心悠然眼中久已無人間桃花
非花水非水赤城霞氣蒼梧煙便欲乘龍向天闕一夜飛度瑤

臺月手弄桃花三度紅
倒聽幾聲千尺雪

吳江舟中

楓葉落翩翩寒波望渺然
天垂太湖水樹出洞庭烟
酒盡客無醉霜清人未眠
素娥偏耐冷永夜自嬋娟

烟雨樓逢盧石愚少尹

光聯

因話舊遊

久聞逸興滿吳興
兩襲清風一縣丞
我過南湖望烟水
君乘西日亦攀登
雪開上郤春盤馬
雲淨豐臺曉放鷹
他日相逢又何處
也應記得此遊曾

夜發南湖與石愚話別

亦知終別去小立待黃昏
此後各千里何時更一尊
宦貧非計拙政暇是君恩
莫道離情苦飛鴻起遠邨

舟中至夜

靜覺寒生醉卽和翦殘紅燭照顏酡來船鄉語吳江近隔夜邨
醪浙水多正喜詩情閒處得何妨佳節客中過西風莫把歸程
阻便到歸時又若何

阻風

收起蘭橈卷起篷看他帆影去怱怱長年莫苦低眉坐撥轉船
頭卽順風

人生鼎鼎百年身幾夕團欒笑語真路本不遙家日近尙因佳
節倍思親

新嫁娘

妝罷窗紗日影偏含情猶未出堂前生無姊妹嬌原慣嫁得兒
夫穉可憐風雅早聞吟雪裏聰明微露額山邊從今已是蘋蘩
婦好咏關雎第六篇

寒夜詞

龍鬚八尺錦紋鋪活火櫻桃煖得無
妾有心中香一縷願郎常似博山爐

海燕銀魚作錦窠海濱滋味莫如佗
作羹與卿供朝膳願得雙栖一燕窩

元默困敦

新年

新年百事總翻新燈火叢叢開四鄰
恰有東風能徇俗但除明月不生塵
詩人獨守梅花靜書卷能忘菽水貧
一巷青山儘幽悄卻從方寸自尋春

過某氏園係絳雲樓故址

樓臺雖好自蒼涼閒話前朝易夕陽
奇籍已沈灰萬劫清陰猶

繞木千章花能得氣春偏短石爲無情壽獨長猶喜烟雲供眺
賞滄桑休問耦耕堂

茅亭行

吾族本芝公名朝讓崇禎四年進士守閩嶠藩豫章
悉有惠政歸田後結茅山麓闢圃樹梅榜曰平章香
白百餘年來零落旣盡亭亦垂圯五世孫璫莊手整
亂石編竹爲籬補梅其隙屬余作是篇

入門青山在屋裏斗大茅亭傍山起都無藻績炫耳目但有縹
緗式浮靡去年大雪三日狂主人讀書不下堂夜聞驚風折庭
竹仰視七星橫屋梁天晴葑草疊亂石頭面不梳一月忙我來
芟除事甫畢隔牆正度山梅香兄家五世小方伯宦成歸來頭
未白手種梅花三百株花時座滿平原客亭中潑墨滿四壁亭

下落花深數尺祇謂終娛衰老身豈意長留子孫宅世間得喪
如雲煙沈沈華屋能幾傳絳雲一炬久焦土輞川十畝成閒田
茅亭如山屹不動絕勝廣廈千萬間固知惠政卽世澤天之報
施非偶然居官祇飲福建水構宅豈用江西錢梅花雖無勝國
樹破券猶藏萬歷年卽今吾兄能耐寂日擷寒蔬自飽喫夜夜
書聲徹縣城年年竹筍穿鄰壁手補梅花傍竹籬謂兒休笑種
花遲汝曹守得茅亭在會見寒香最盛時

秉中兄

增莊

葺亭甫畢適有持茅亭圖求售者署云本

芝族祖結茅植梅落成大觴賓客某爲補圖順治七
年姪孫畦作筆墨清超不減石谷惜畦之名不可考
亦見前人具此高手隱而不彰者多也重爲作是篇

吾兄種梅纔兩日忽然梅花開滿亭千株萬株一齊白不許山

到好春時

開遲倍覺耐人看
漠漠輕烟散曉寒
昨夜五更孤枕上
惜花心苦雨聲酸

瞿菊亭孝廉 韻 投筆圖

剡溪藤紙白雪光
澄泥磨墨浮生香
客來催詩扣門急
抽筆欲落心徬徨
丈夫身如穎處囊
徒以寸管論短長
徑欲棄置若秋籜
上馬力挽雕弓強
燕頷虎頭豈有種
盾鼻揮毫亦神勇
寧使虬官比衛霍
未甘冷局隨南董
展君此畫同我情
相約出門爭請纓
忽然闌筆發狂笑
此計毋乃真書生
方今區宇統萬國
月白龍沙靜烽斥
五服山川入版圖
八荒箋奏來重譯
將軍競病憂題詩
弟子丹青工設色
書生赤手報昇平
舍卻毛錐更何役
三月四月花滿湖
南鄰北鄰相歌呼
與君載酒覓詩去
且作識

字耕田夫

蔣文肅花卉冊子

東閣平章椽筆濡丹青餘事費描樨繡衣當日蘭臺上只繪窮

民十二圖

文肅父伊爲侍御時
繪窮民圖十二奏進

樵憩圖

拾得枯枝斷澗邊松陰隨意可安眠笑他擔子爭挑起世事何
時肯息肩

美人障子

霧鬢風鬟秀絕羣碧天如水翦羅袂從中看破離騷旨只是湘
江幾片雲

趙松雪畫馬歌

平原十里蘼蕪香蠻奴短褐控紫纒錦韉已卸珠勒解龍馬骨

法非尋常目爲丞相雙龍閃脊爲將軍五岳強龍
健麟腹龜尾森開張五綵九綵文采異七尺八尺腰身長或如
連錢耀金彩或如撒豆生鐵光或如赤兔逐景滅或如紫燕迎
風翔或桃綵斑浴芳潤或碧霞片嘶垂楊或聳驂耳決春水或
迎玉面騰寒霜八馬相皆千里馬誤差越睽來殊方或言卽是
古八駿逸出天廐馳遐荒古有唐公之驪驪抑聞銅雀御始皇
綠螭浮雲屬漢帝玉獅照殿誇蕭梁丁香叱撥進天寶拳毛特
勒收靈昌杜重威之吉祥座景延廣之肉胡牀一齊皆出此馬
下龍精上應天星房駿乎曷不貢廟堂三阜六繫左右廂鳳花
官字刷小印龍媒上苑開廣場金鈴箇箇綴玉繅紫纓垂垂連
銷纜朝噉棗脯明紗豆夕秣蒼草沙蓬狼節逢千秋陳馬戲部
按五色分鷁行食以三品許自在爵之上將稱龍驤卽云馳驅

阻皇路曷不騰躍行康莊章臺楊柳暗夾道南浦杏葉馱輕裝
翩然流星逐綺陌冷然翦水過芳塘胡爲長鳴顧衰草徒事弔
影登平岡旣非烏銜卜壽促又豈的額防人傷三羸五駑自歎
段七驄八白空軒昂我今爲馬轉慶幸馬其聽我聊徜徉善御
高手無王良善相明眼無孫陽市中三日尠回顧廐下一舞詫
不祥鹽車蹭蹬困驥足負棘偃蹇盤羊腸否則羈紲伏寒櫪偏
窄何以殊犬羊不如原野且瀟灑玉泉爲飲花爲糧馬聞不嘶
亦不動不對以臆真枯樞一笑始覺馬非馬松雪妙手摹南唐
還君此畫三大息門外蕭蕭駿骨誰收藏

春草

春來何物最先知原上離離綠易滋幾日落花人去後一番寒
食酒澆時西堂暗助神來句南浦新添恨別辭水國不須紅豆

子芳洲處處是相思

條條翠陌界花邨細踏微行似有痕一笑輸贏由仕女十年離
別怨王孫青袍往事空回首綠鬢流年易斷魂塞上健兒驚碧
色春風吹出玉關門

燒痕一夜又生芽春氣蓬蓬勝似花嬾得剪除高士逕巧知回
避宰官家無人脈脈空庭發有恨縣縣遠道遮認得踏青歸路
好裙腰幾曲抱山斜

春愁一片正茫茫綠到天涯襯夕陽放野驩驩初識味出城蝴
蝶早知香千年青冢多生氣三月紅閨最斷腸焉得化工齊變
種只教護草合歡長

題李

佳

落花詩卷

佳

死後九月其母抱遺詩來見道

佳

臨歿諄諄求主

人一言中有落花詞六章情感纏綿寄託深遠故主之思溢於言外既哀其志將序而刻之先題其首

瓊樹歌殘璧月昏事如春夢已無痕
襄尸自畢孤臣志翦紙誰招萬里
冤鉤臂蒼鷹先遠颺紅絲歸燕尙知恩
山香一曲淒迷甚舊怨分明短笛論

花夢謠

天空無人起樓閣白玉玲瓏五丁鑿
百丈青霞頂上盤一聲鐵笛橫吹落
仙之人兮不可招二十八宿光搖搖
花枝委地杳如夢中有蛺蝶春冤飄
古崖嵌空若仙掌坐老青苔土花長
東風忽吹白日西珊瑚擊碎玻璃響

陽春曲

千金買得狐白裘萬金買得關內侯
陽春一刻買不得銅山倒

作雪水流美人不來春已去游絲裊娜隨風絮紙錢灰白死復然夜深吹上冬青樹人生不如朝槿榮今日開落明日生有花須看看盡飽有酒逕醉醉莫醒君不見綠楊枝上黃鸝好一對
絲蠻話春曉風前能得幾回聽柳條柳條青又青

筠樵三十初度

陳君長安歸未久飲客長安市中酒各罄頻年落月心喜開今夕銜杯口酒酣拔劍歌嗚嗚自敘天涯客思孤華帽塵容謁卿相笑談豪氣傾屠沽丈夫出門喜結納幾人不負盟車笥滾滾紅塵路五千蕭蕭青鬢人三十四座聞言各慨然座中惟君最少年願陪翦燭同心話聊當稱觴祝暇篇君才如此真希見君遇人生更歆羨琴好敦餘泥拔釵筌詩補就工調膳綺歲誇題白練裙翩翩詞賦本凌雲下帷方丈曾依佛拔幟園池屢冠軍

春風走馬章臺陌文中繡虎人中璧畫眉餘筆學丹青脫手新
篇壓元白白門秋柳繫蘭橈幾度攀條舊板橋青眼看人惟北
固碧紗籠句遍南朝翻然北走燕山道回首江南山盡小客舍
爭邀麈尾譚郵亭傳誦牆頭草聲華一月滿金臺轉瞬花黃兩
度槐已博詩名垂宇宙暫因小劫謫蓬萊卽今潦倒歸鄉里滿
篋新詩重行李投轄仍留珠履賓典斟只少銀箏妓便借今宵
酒似澠祝君才筆埒岡陵莫信文章憎命達須知學問與年增
書明成祖拜左善世道衍太子少師救後

金川門開火光起叔父上殿王室燬英雄成敗豈偶然不然亦
是宸濠耳是何異僧目三角敢勸外藩圖不軌後苑喧嘈驚鼎
聲前門參養貔貅士一朝簷瓦墮地碎燕王色變道衍喜決策
公然靖難師長驅直薄平安壘孤軍朝敗玉馬河單騎宵奔白

溝水不聞帷幄子房張兼少山人白衣李迎降功合歸景隆戰
死功應推世美卻教髡首冠朝班特敕緇衣易金紫老成已許
列蕭曹輔導還須辟園綺我思成祖亦英主不念貽羞著青史
縱令僂辱盡吾儒乃屑風雲借釋氏當時大統旣傳孫天下民
心皆向彼金匱難寒牀下盟委裘敢奪官中璽方懼削藩鼂錯
謀忽聞相背蒯通指富貴應盟密語時元勳首重陰謀始養子
俱除侍讀官異端竟配高皇祀不數圖澄拜國師何論羅什婚
宮妓慚顏只有罍兄甥卓識更超成聶姉此敕何人奉詔書在
廷唯諾宣麻紙投筆於地死卽死誰似瑯瑯小韓子

春日卽事

一寸蘭膏一寸灰蝶寬雙宿惱鶯催花非薄命何殊草詩若無
情不算才風雨東皇如夢杳湖山西子少睂開亦知消恨惟春

酒卻欠前生帶量來

神女荒唐巫峽遙雨聲何事送朝朝天憑二月將春作

讀去聲

人

住江南要福消入幕雙雙新白燕穿城六六小紅橋開門芳草
連波綠認得尋詩路一條

一帶湘簾未上鉤濃雲低壓畫簷頭埽晴壤竟難舒力喚雨鳩
偏不轉喉沈醉自拌推玉倒浮生專慣替花愁開窗暫洗雙睂
碧猶喜青山滿一樓

好友同城幾箇賢扣門來結買山緣眼前邱壑神仙住身後文
章富貴傳分野此間原應斗論才吾輩合生天連牀一夜聽春
雨話到看花盡廢眠

題王文成公自書詩卷後

學人不習武功臣不通儒道學與功業千古判兩途留侯儒者

象武侯王佐模按其平生學究與古聖殊文成擅異稟蚤歲熟
典謨謫官居龍場化俗導蠻區陳編忽啟悟心學求虛無遂開
良知說一空理障拘爲教立三字如聖舉一隅天泉流水活陽
明春風俱一朝主節鉞百萬控貔貙兵制夷魚鼈神謀發虎符
殲魁首大帽擒賊自象湖九月橫水破正月仲容誅進攻九連
山生縛三泖俘偏裨殊足將巨寇如摧枯遠近驚爲神誰曰書
生懦境內始寧輯藩王生覬覦間謀阻東下深計保南都搗巢
斷其後分翼利其孤邢珣繞賊背文定火燎鬚大舟膠淺水小
舟焚菰蘆功成若譚笑焉用輕翦屠捷書至京師將軍下天衢
欲令故放縱以博王嬉娛奇貨不可得羣小肆詆誣呼名旣謾
詈強射聊抑掄固辭不獲已徐起鸞雕弧三發三中之京軍皆
懽呼慷慨非投筆從容勝葉繡此豈尋常人真乃大丈夫勲名

盛鐘鼎文行高瑾瑜或來虬蟬撼適比燕爵愚經訓守曾孟儒
風埒薛胡雖尊象山陸非詆紫陽朱但求符節合詎貴印板摹
兩賢儻同時學術寧殊趨或疑類禪學習靜同跏趺其實誼道
記出自姚江徒千秋仰高山一卷珍明珠字蹟瘦且勁詩味清
而腴繙繹不忍釋慨慕徒增吁何人題卷後乃屬張瑞圖名著
逆案中身辱忠賢奴生祠文瓌瑋褒詔辭芬敷皆出是賊手以
獻上公諛對策尤悖戾聖訓敢齟齬罪止坐落職殺豈足蔽辜
留此狗尾續何異佛頭汙并刀速割去蕩穢煩紅爐

三元堂銀杏樹歌

老樹如人瘦而立迎門鞠躬作長揖密幹橫遮古殿陰枯根半
浸寒池溼下蟠到地幾百丈卻走九原螭龍蟄上蟠只許一百
尺當頭爲有青天壓夕陽欲落新月來西邊枝送東邊接問君

迎送歷幾回三萬六千場一霎道士爲我言生年逾九十曾見
青蒼最盛時日月不容光照入每歲秋風葉似山幾番霹靂身
逃劫百年人與樹俱衰自捋長髯霜肅颯我語道士此海灘前
朝漁艇如雲集繫纜多從此樹根青山尙有潮痕摺當時老樹
不知幾百株此株獨見滄波作城邑世間已無歷劫不死人爲
問此樹何時長枝葉世間更無歷劫不死我看到此樹盤根幾
百匝回顧道士笑不答枝上晚風吹獵獵

紙鷲曲

一綫到天能有幾一隻未高一隻起引得兒童少女心一齊飛
入青雲裏春風靄靄宿雨晴欲舉未舉誇身輕纔離屋角情如
怯得過樓頭勢漸平吹噓自有長風送助汝凌霄幾收縱出手
猶聞片紙聲入雲已覺纖毫重忽東忽西如將翺忽上忽下如

爭高重來燕子仍絲繫颺去蒼鷹未解絲居然兩翼如開翦到
得天心纔一點便合長從落日歸如何只作飛花颺天風漸急
莫再沖采絲吹斷墮長空糜軀粉骨尋常事未必還歸舊手中

小女

小女顏如玉雪兒銷綳三月學啞咿前生教與之無字抱立春
風若有知

寒食是阿安忌辰

宿草萋萋長墓田不逢寒食已淒然塵生東海方重見痛抱西
河已兩年珍物每經思更好廢材幾見老堪傳從今悟澈情魔
障愛汝翻成誤汝愁

思子臺空望眼癡慰情弱女當男兒卽論骨肉原同母細認丰
容宛似伊哀到過情翻欲笑事從無理始成奇金環一任含餬

弄纔要分明便可疑

鴻爪何從覓印痕還憑焚處一招覓正愁野鬼羣相妬便化飛
仙骨總存藤蔓青春纏櫬木鼯鼯白豔鼠松根百年保得孤墳
在只有耶孃沒子孫

愛潔天生不耐腥冷羹殘炙料非馨酒漿滴滴求陰濯楮鏹紛
紛使鬼靈少府定婚誰牌合方干追第待幽冥九原若有聲聞
覺分別耶孃語細聽

鮑叔野僧服拈花圖

男兒生不到斗牛奎壁間落想逕欲生西天西天老佛不識字
一手操縱金行權黃金不圖作惡與作善只圖華鬢市上花枝
選金剛努目盡回瞋菩薩低眉忽開眼眼光照定花枝上千百
芳心一齊放隻履都成蓮瓣飛袈裟遍染桃花浪春風搖搖忽

驚顛陡然飛落丹霞片一口吞鍼也自拌千回祝鉢何曾見簷
蔔生香背後來優曇彈指空中見下方一聲聞霹靂座上微微
笑口拆但須吹氣勝如蘭那貴禪心真似石青帝弄權愚人
一年只許九十回芳辰請將此花分作百千萬億朵一一散與
人間春拘勿頭波頭摩分院利鬘陀羅任他玉手爭摩挲狂蜂
浪蝶拌死來作花間魔世尊搖手道不可忍使羣生赴湯火能
從好色煉長生萬古荒淫惟有我無情爲名花有情爲美姝入
我手中生出我手中枯槁體一百八穿作牟尼珠髑髏墮地作
人語當時本是如花女

再題拈花圖

脫卻青衫澣卻塵公然作佛勝齊民託將天女司花意幻出維
摩示疾身天上埋憂偏有地空中好色不傷春只愁一見優曇

影誤殺相思世界人

黃鵠操

嫩吳節母顧夫人也爲孤子吳頊儒作

黃鵠兮嗚嗚宛頸獨宿兮尾畢逋君有母兮妾爲子君有孤兮
妾爲父君九原兮誰與爲偶君墳兮一尺高手澠紉兮終歲勞
君墳兮二尺許手皸瘵兮積歲苦累君墳兮三尺從君姑兮尋
君於幽宅朝哺兒兮淳母算蔽兒兮綈襦兒今成人兮母已永
徂嗟吁嗟吁兮人而不如鳥

遊三峯寺循中峯達秦坡澗攬鵠峯蟹泉諸勝宿白雲
樓作

孟夏草木滋連巖結幽綠林禽候初改隴麥秀未熟孤生疲短
筇冥想入遐矚岡回積層陰寺古鎮修谷賞心撫青苔解帶憩

密竹遙見蒼翠中互嶺勢起伏清暉襲人衣遠眺殊未足循蹊
翫迴轉防澗屢逕復臥石分奔泉鉤藤絕樵躅颺輪出潭心
羲馭駐巖腹極造追青冥微茫辨坤軸林霏夕已成海氣暮更肅
遙遙一逕雲先我西峯宿意愜澹歸懷志曠渺衆欲方期松嶽
貞羞與榮利逐默坐觀所尙披衣炳膏燭

泛舟湖中觀諸峯

初日澄明湖浮舟肆容與陰霞豁中川遠樹辨極浦林斷疑無
邨山橫忽迎舫迴波連折旋列岫互吞吐飛鳥去不息游魚清
可數擊舷發清商褰裳擷芳杜習習風生和泣泣露零滑撫化
悲盛年接歡懼薄祐景運麗陽澤努力事稽古

蘭澤搴芳圖

幽蘭被芳澤芙蓉媚寒渚油油孝子色采采涉江深紅者爲親

顏白者爲兒心如花力拒霜如草香不淫雖無人爵貴樂不移
千金時發靈運思補以束皙吟儔爲絃此詩聽之聲懽懽

贈洞庭山友人

四月薤香九月柑洞庭風味甲江南從中結箇煙波宅分與萊
妻霸子甘

洞房絃索響瓏玲常有蛟龍出浪聽爭道美人睂黛活飛來七
十二峯青

送春曲

斟丹酒泛霞觴送青帝向炎方落紅萬點爲裹糧雲車直指山
之陽呈皓齒發清商送青帝向西方柳花如縣作輕裝姍姍來
迎其夷光元駒駕阜蓋張送青帝向朔方墨牋上奏天帝旁乞
將忘憂樹高堂離離草宛宛楊送青帝向東方綠陰如幄祖道

長奎邪璧邪帝故鄉帝從四角轉中央金雞兩翼升樽桑照見
蜀山之銅燦燦黃不能買一寸陽光

天真閣集卷七終

天真閣集卷八

詩八

昭文 孫原湘 子瀟

新綠

一夜飛花都埽卻天教雷雨洗層巖展開碧落心俱淨隔斷紅塵境不凡逝水年華愁綠鬢故園生計感青衫叢叢草色猶春意分付奚童莫浪芟

同遊小石屋和竹橋丈

一逕煙深鳥不譁數聲清磬洗繁華雲歸古洞纔過雨春去空山未落花幡影日高僧放梵松濤風細客煎茶世間何限清閒福偏向紅塵苦寄家

孤蓬篇

節婦黃氏邑陳氏婢媵於張有寵方震不容於陳遣

還及張卒攜其子請歸一視舍殮臥殯所二載陳益
逐之急且令逼於母迺託疾絕粒而死

孤蓬生麻側直起何茫茫婦人無貴賤皆得從一終攜孤拜靈
牀孤不識阿翁當時出君門猶在母腹中朝飯靈牀西莫臥靈
牀東鵲鵲叫屋角蟋蟀啼房櫳誓將以賤軀從君於殯宮阿母
入門來謂兒且從容離離春冰泮灼灼桃花紅爲兒擇嘉耦勝
似妾媵充長跪語阿母兒命如秋蓬雖在妾媵列所遇猶厄窮
皇天厚余毒疾疾加微躬鋤羹何秘醇不得壓我胸豆糜何馨
香不得入我隴良人在泉下或許賤妾從

剖胸操

邑黃氏女母疾瀕危潛割心頭肉和藥以進母竟差
旣殯於張有士行夫庶母黃被逐於嫡爲之力請得

歸事別載長洲汪孝廉

元亮

所爲傳

世無良醫坐視母死兮身焉用之母視兒兮心頭肉還憐兒肉
兮入母腹入母腹兮母疾竟差母疾不差剜兒之心兮兒何敢
辭

送伯兄謁選入都

與君爲手足兩載共家鄉又上驪駒去從分鴻雁行臣心應似
水親鬢已如霜先問陳情日須知報國長
家食誠非易飄然去覓官已登從政地莫作爲貧看清節先人
在遺風紹述難但求慈母健長許弟承歡

送邵大虛中

飲我尊中酒酒乾君便行桃花昨夜落春水大江生離別嫌情
重饑寒覺道吾兄賴相與不敢勸歸耕

贈江陰蘇丞 琰

少年逸思滿西陵
酌酒歌騷一縣丞
生負俠腸多感慨
老撝詩骨尙嶮嶒
不安俗吏知機早
每愛奇才折節能
三十三峯歸臥好
梅花爲婦月爲朋

靜觀自得樓

山重重樹重重煙濛濛
霧濛濛靈機一片貫當中
危樓突兀撐晴空
樓中無人惟有我
卷簾直對青天坐
山外青山縱萬重
皆我目中天所裹
豈無幽泉泉不鳴
豈無微風風不驚
靜中真氣一鼓動
落花啼鳥皆人情
不見山非山
樹非樹煙非煙
霧非霧
化機無日不自然
動中那得知其故

立夏日聞秉中兄訃

不因吾族歎衰微
痛失虞山老布衣
人與三春同限盡
客來雙

淚帶花飛蒼茫文獻今誰嗣質樸襟情古亦稀只在茅亭竹深處清覓夜夜月明歸

消夏雜詩

竹牀冰簟恣安眠一雨涼生九夏天侵曉奚童報奇事門前新到賣書船

敲門一卷送烏絲便滴荷花露寫詩書罷任人評泊去先生只當自臨池

同子侃赴金陵作

秋塘風細落宮槐葉葉雲帆曙色催一舉豈完吾輩事兩眉須博老親開清時人物難高隱白下江山足逞才準備生花青鏤管題詩同上鳳凰臺

昔夢

鴻爪難尋印雪盟可憐前夢太分明西風欲醒鴛鴦睡荷葉盤
中碎雨聲

秦淮燈船曲

秦淮水波滑可喜拍拍雙橈如燕尾臺城年少醉不歸白袷當
風坐船裏夕陽初下長板橋新月未透楊柳梢羊燈初安蠟花
吐三點四點明星搖東船新翻細腰鼓西船競按涼州譜一派
笙歌起雨頭行到中流萬星聚丁字簾前繫桂橈畫屏銀燭正
高燒屏間水際光相射紫焰摩空豔不消蓮塘驚起雙棲鷺蓮
葉枝枝化青霧乍擬珊瑚東海生不愁金餅西沈去夜靜霜風
透夾衣洞簫聲歇衆星稀此時寒女幽窗下一點殘燈尙搗衣

水榭歌

一家湘簾初揭起家家闌干有人倚照水新妝淡未勻夕陽紅

到銀塘裏盡艇西風打槳遲歡來是妾下樓時早防橋外驚鴻
見不使門前喜鵲知蘭房曲折迷花路文窗百納深迴護翡翠
巢低架水安鴛鴦社小凌波度黃金纏臂銷纏頭徹夜歡聲不
解愁詩格有誰吟棧館豔名爭喜學睂樓舊院荒涼珠市閉板
橋零落余懷記只有秦淮水一條尙餘六代鶯花氣蕩子錢拋
水浪圓銅山到此化雲烟有人尙說金閨好一夕能消百萬錢

題隨園壁

白下畱袁粲青山傍謝公地形如畫裏天意屬詩翁竹洗三秋
暑花餘六代風雲廊如許借我是古梁鴻

隨園先生招集上下江名士張燈設宴卽事四首

平生逸氣到來收袁粲才名壓九州愛士未嘗忘倒屣見公無
柰自低頭山中事業金魚換海內文章鐵網搜雨扇龍門開蕩

蕩五湖鷗鷺盡來遊

此間原是小蓬瀛談笑春風滿座傾四海人才歸月旦一家文
集早風行秋來對客飛觴健老去看山著屐輕身到天台曾兩
度桃花應亦識先生

江南江北幾豪賢盡在先生杖履前玳瑁牀無分上下瑣璊屏
自徹中邊老人獨冠羣星座名士同徵八月天登李門難登第
易諸公努力事歡筵

水木清華夜氣澂酒闌人坐玉壺冰已催火樹花齊發更約瑤
臺月共升四面盡懸端午鏡千枝忽見上元鐙分明絕世文心
變一粟能教化萬層

雨中出水西門

脈脈短長條依依舊板橋如何桃葉渡不繫木蘭橈花氣縈孤

夢江聲走六朝同舟秋思滿况是雨蕭蕭

遊幕府山十二洞登天台洞放歌

環山一十二洞空玲瓏萬古噓喻洪濤中山根煙雲出復沒石
壁搜剔天無功歷十一洞已陡絕遠隔人境惟鳥通陽鳥有腳
走不到一綫畧許窺青空陰房忽疑雷雨集百千蝙蝠撲面飛
隆隆同人到此歎觀止縱有奇境安能窮平生事事落人後只
有鑿險無謙沖天台縹緲挂我眼佳名已足醒疲聾縱無桃花
引人去焉知其上不有玉闕兼瑤宮懸崖撒手逞輕捷竟登絕
頂捫長虹洞蒸山氣轉低溼幽扉靜鎖雲濛濛赤城石梁了無
覩何況風裳霞佩仙妝紅拂衣逕欲下峻阪始覺徑險來時雄
草枯石滑不任趾以尻代足腰如弓下方觀者各股栗一失性
命輕如鴻到地相看笑拍手誇說奇境如衡嵩同時涉險有二

子蕭百堂張椒卿秀才鐸餘子惛伏如蟄蟲歸途微聞各歎息悔不兩翼

乘長風乃知人生儘有未到境望而不得徒忡忡如聽人說天

台同

九日同翁紫書孝廉咸封子和子侶登大石山房

一房高聳翠螺鬟石磴煙蘿手共攀潦倒雄心看落日巔岈瘦骨傲秋山雲中隱隱寒樵下天外飛飛倦鳥還爲語西風莫吹帽清溪愁見鬢毛斑

沈思葵先生輝玉歲貢生原湘受業師也母夫人張以

節孝著聞先生旣上其事于朝得表閭之典復手

次行畧授湘讀之而俾爲之辭曰

黃鵠聲鳴嗚淚盡血以枯婦道自此畢從死何踟躇白髮扶杖來謂婦且須與事育兩未了柰何徒殉夫收淚還入廚手自調

甘腴上堂獻姑嫜姑嫜食無餘含淚還入房撫牀泣呱呱不忍
視兒貌兒貌如耶孺大義不得死仰天惟嗟吁上有七旬老下
有三歲孤

兒年日以長家貧日以苦所親入門來勸從維陽賈再拜謝所
親願自持門戶翁欲償宿逋力作一身補兒欲具束脩辛勤十
指取教兒讀孝經教兒讀論語孝經學會閱論語學伊呂耕也
餒無粟學也祿有糈

兒學亦已成母命不再延死本無所戀苟活已廿年旣得代姑
命復得見所天彌留執兒手願兒抱陳編汝家葵軒公進士清
白傳字汝曰思葵黽勉紹乃先終身佩母訓節義固敢捐節義
爲顯揚安用科名焉濡毫寫母節一字一涕漣辭誠動朝廷

破格旌母賢

夫人守節二十載

某也列門下作詩壽朱絃是母與是子

千秋視此篇

粥書樂

生不合讀萬卷書三十潦倒棲田廬雖然束書置高閣腹中字
多生蠹魚昨來大醉發狂嘯驚走二十八宿僵蟾蜍却看妻孥
餓屋角蓬首垢面相欬歔急燒枯薪煮字喫饑腸依舊鳴轆轤
抱書出門淚洗面如送好友登前途芸香盡散作銅臭舉家轉
恨爲歡娛飽餐脫粟擁絮睡夢見玉皇召我登雲衢賜我沒字
碑封我詒癡符汝往欽哉毋曠職予有慶爾耕田夫朝來急走
視同學家家破屋聲咿唔天之所福不在此徒自苦耳胡爲乎
胸中但識一丁字明日餓紋隱隱生皮膚

書漢武帝內傳

王九光母桃花面四千餘年容不變青鸞騎上玉皇家墮地還

登天子殿我聞碧桃花三千年作葩更三千年方結子四千年
雖長一度花開耳花開一度一思量暗遣雙鬟郭密香寄語阿
環攜玉女暫來人世看滄桑夫人報札分明說使者先承太清
敕正須暫去去當還還便親來覲顏色我道夫人真誤矣天上
須臾世千紀按罷元洲鶴馭來茂陵原上秋風起

與歸館爲百堂子山賦

婁東二蕭子金玉交輝新百里無青山秀氣乃在人魚塢頗清
曠烟樹霏輪囷幽居事稽考怡怡樂天真伯氏才橫軼奴僕命
靈均仲也考鄭學自稱司農臣聲名滿吳下著述期千春三十
不快意頽然兩窮民男兒無錢刀何以行其仁去去爲鸞鳳翱
翔東海濱還念下民咨安能決蒼旻聖賢貴發憤哀樂且置身
鳥獸與同羣松喬胡足論

昭陽赤奮若

贈松阿丈

邵公在鄉黨器宇最英特綺歲懷經綸辭翰稱官職志澹羞爲
名言危懼沾直拂衣東海濱策杖南山側形神怡絃歌氣力課
稼穡毋晉前輩型勉爲後生式湘也少不羈讀書務經國偶然
耽嘯詠實恥託翰墨飛騰如得路絕塞無餘力卽分寸權能
使凋瘵息一上京兆歸再試南畿抑蹢躅疲驢塵消沮壯士色
栖栖蓬戶中顧影欲自匿甚感公意厚譽我違衆臆不得孔融
薦尙賴李膺識饑寒稍自信未敢毀脩飾今年公七十鄉里尊
齒德周官重鄉飲正月以禮食古風如再覲公負少師則如謀
賓與介公意其誰克

送子和赴禮部試

十年前事夢蘧蘧雪北花南共蹇驢健飲同時中聖酒衰親終日盼賢書如君老眼猶會慰愧我浮生自覺餘今日臨歧更何語各飄清淚滿襟裾

喜晴寓吳門作

庭樹乾風噪晚鴉茶烟縷縷出輕紗比隣香熟開釭酒深巷紅來轉擔花久雨乍晴如失病近遊逢月亦思家春光滿眼無心看只看天邊一朵霞

阿安墓下作

淺土纔三尺荒郊已五年神應遊碧落骨豈朽黃泉松柏翠成古梅花香作仙

兒所愛庭梅亡後樹亦隨槁

慰情添弱女與汝貌依然

泛舟迎春橋訪竹橋丈

雨歇片雲妍風輕蕩畫船夕陽紅上塔春水綠如天罨畫疑無

路尋詩亦有緣出墻老楊柳揖客向門前

內人抄索笑集成戲書其後

疎影橫斜月上時蘭薰露盥寫烏絲怪君齒頰生香氣不讀梅花以外詩

送春

行遍迴廊獨尋天涯何處不傷心懷人正下縱橫淚啼鳥猶工宛轉吟夢境流離空一枕酒痕狼籍認雙襟遙知小院花飛後暗數青梅立樹陰

首夏同人遊石屋

昨與白雲約待我西山巔拂衣凌絕磴翻在飛鳥前招提隱叢樹鐘磬流清泉洞陰氣逾煖春空花自妍登樓見滄海一氣青入天原野包衆綠靄靄生人烟遊目縱所遇得意因境遷美人

澹相對松風何冷然請君張玉琴爲我揮素絃

贈趙子梁秀才

同鉅

卽題其蘊玉樓

飛絮行雲世態忙街西小杜獨清狂酒因量淺兼仙佛詩到情深似女郎松雪齋無塵半點蓮花莊在水中央相思一角城南路夜夜清輝滿屋梁

神仙夫婦愛瓊樓邀我題詩最上頭書校南唐眞寫本茶傾東武舊藏甌此間花氣清於水何處琴聲脆若秋檻外輭紅塵十丈晶簾卻下自瀛洲

苦雨詩

皇天復何雨二麥已不熟自春徂中夏日日處幽谷吾吳本水鄉隄岸賴增築大開吳淞江旱澇備瀉蓄自從海塘淤河身日以蹙地利人不脩徒仰天愛育東南最窪下畛隰成溝瀆久絕

插蒔想舍辛賣黃犢西北稍高阜田泥溼漉漉今日一犁秧明
朝又漂覆轉眼過小暑四境成湍洑饑寒乃吾分但慮官倉穀
在昔乙巳歲赤地遭炎燹低鄉食粥糜高塍轉瘠肉連歲稍有
秋二糴米一斛風俗還其淫元氣未大復又聞大海波千里接
艫舳奸民匿民膏一飽羣盜腹所恃屢豐年籌車滿種稂今如
絕耕種民死迺倍速簷前飛瀑聲聽似四野哭水耆狂之徵人
和感時淑天心自仁愛民氣毋怨譴願返金烏光一照逃亡屋

嬉春曲

一聲兩聲鶯語滑十處五處花爭發聞鶯身已化作鶯翩然不
肯離花行看花心已忘卻花但覺花外非吾家性不喜飲卻喜
醉醉呼紅霞蓋爲被夢不見花卻見人美人原是花分身我方
沈沈臥花裏鶯又關關喚我起起來抖擻花滿衣香在衣上不

肯飛一春吟顛顛不了除卻看花卽聽鳥不愁黃金入手空只
愁鬢老花不紅耳目聰明天所縱可憐但爲花鳥用聰明不用
亦何爲堂堂白日將西垂義輪鞭春馭可綰塞爾兩聰障爾眼

生辰曲

荷花昨夜開未開妝成笑出珠簾來阿儂那似荷花好恰比荷
花生日蚤郎折荷花供佛前祝儂身似華山蓮儂是荷花郎是
葉障日遮風緊相貼郎爲玉藕儂爲花兩體分明是一家蓮心
內含花萼附似郎辛苦儂所護花惟一心榦一莖似儂身輕郎
所擎郎自采花愛花色儂自願郎采蓮實郎言結實在花中不
采蓮花子不逢儂道采花如不已旣損花容焉得子郎知歡笑
不知愁但折花枝當酒籌妾飲郎盃後天老翻祝花顏似人好
花亦低頭獻碧簫勸儂醉面比芙蓉明朝轉更勸花酌花盡盃

頭開灼灼

同心曲

儂心赤如日卿面素如蟾東西本相照只隔一重簾
簾外不分明簾內光如電不得見傾城自得傾城見

七夕飲趙子梁家分韻四首

清淺銀河儼畫圖星如環佩露如珠九霄月老應煩姊一夜天
涯盡望夫拌得經年成曠別留將終古作歡娛不知歲歲諧花
燭添箇童牛小女無

碧空烏鵲羽翛翛隔箇銀灣素手招千古風情如抱桂一彎月
影恰成橋應憐卻扇新原舊無奈行雲莫作朝手纖綵絲三百
丈如何繫得住長宵

卷簾黃月一鉤新小院秋光絕勝春花競雙身承雨露人羞孤

影拜星辰家家士女工兒戲世世夫妻笑太真究竟別離誰得
免欲將此恨扣青旻

瓜如繩削果玲瓏定出靈心妙腕中地主喜開清閣閣天孫羞
傍廣寒宮情絲一縷仙猶縛機械千般世自工我是壯夫兼鈍
漢慢勞神巧助雕蟲

觀荷行

澄湖接河河接田秋水欲浮舟上天遠聞荷香不知處空明一
片玻璃圓延緣蘆葦得異境不是陂塘是畦町清波淪漣半沒
篙日華蕩漾青苗影野樹叢叢繞水隈根株浸沒生莓苔船從
綠枝疎處入鷺鷥見客驚飛回蓮塘朝煙凝漠漠蓮花如星疎
欲落紛紛水草弄輕漪青山倒影東南角花間老叟跂足待指
說殘花莫輕采百頃腴田化作波祇餘十畝蓮塘在昨朝官帖

忽下鄉官府赫赫來勘荒蓮花采折滿官舫零落一池荷葉香

聞蟬

寂歷虛堂百感并一絲搖曳午風輕綠陰如屋高吟穩仙露爲糧得氣清短翼去天偏較近浮生與世本無爭隔林聽到聲希處消盡人間幾不平

一逕碧雲含晚晴涼颼又送雨三聲料應占得最高處究竟知從何樹鳴屋角夕陽偏不瀉天涯秋思每先驚無求溫飽真難事愧爾餐風吸露情

號國夫人早朝圖

一聲兩聲銀箭竭三點五點明星沒宣陽坊裏少人行馬上蛾眉天上月寶鈿翠盞金爵裳黃門飛塵鞚紫纒龍樓十二馳道入六宮粉黛都無光是時千官待金咫尺無從望見天顏喜怙勢

應同霍女專承恩欲與昭儀比昨宵鎖幄夢離迷睡起驚看照
夜璣朝來誤被君王問不信人間有達奚他年鼙鼓漁陽搥陳
倉官道啼昏鴉差勝羅衣委梨樹自拌素面凝桃花噫吁嚱死
後無人拾羅襪生前猶恨不得作褒姒

東鄰篇續汝南曲也爲趙子梁作

西都賓勿語北里謳莫喧重提南史筆載誦東鄰篇東鄰有嬌
女骨像娉且妍晨興理雲鬢日莫貼花鈿按拍調清瑟停歌拂
雅絃芳名豔衢巷巷口諸少年來窺嬌女妝醜以雙玉環上嵌
明月珠價值百萬緡羅敷自有婿父命申婚姻父死阿母貧節
義敢自捐寒脩入門來中攜一緘書謂從婿處至中堂立踟躕
踟躕復踟躕欲語還囁嚅開緘無一字雙淚落紅裾還君玉鏡
臺返妾繡腰襦羅敷不棄媚媚自棄羅敷冤玉作燕石石剖玉

自獻妾心在腹中何由得君見堂堂白日馳耿耿秋燈明兒身
無所屬進退惟母從門前天桃樹花發陽春紅有客比屋居名
與宋玉同體貌旣閒冶辭令復從容時時大隄過怒馬青花驄
花間折花人掩映花玲瓏揮鞭不一顧意氣凌長虹東家屋上
月去照西家墻明月旣西去無復返照光春風入羅幃妾心空
傍徨託身爲飛花猶得上君堂妾顏日以嬖親年日以莫東水
向西流催人渡江去江水渾復渾不見雙淚痕雙淚落江水東
還過君門君家有老媪知妾念君堅憑君試往問往問臨別言
其年四月夏三星初在天君家鄰洋閣對妾明月軒軒前浣花
石傍君青梧垣問君讀書聲朗朗徹行雲石上攀梧枝星光白
紛紛君不覩妾影妾自見君面甚欲通微波自愧身貧賤耿耿
一寸心懷之三年深妾身千金值妾心值萬金千金買身去不

買一寸心宛轉何所寄寄君壁上琴開君壁上琴翻作東鄰吟
不知妾意苦請聽絃上音

贈陸子固亭山居

空翠落衣襟松風吹滿林人如白雲遠秋與青山深惠子槁梧
據隆中梁甫吟惟應江上鵠知爾歲寒心

九日登北山作

木落原野清隴首浮雲飛高臺一以眺秋色蒼然來孤邨隱寒
煙遠樹帶斜暉猿啼衆山暝雁度空江遲物澹我自得情疎理
無違美人在空谷瑟瑟秋蘿衣

新安胡先生復祖少隨舅松圓詩老來遊吾虞愛此間

山水僑城西種翰以老一時名公畸士慕其高致投
詩如束筍歲久零落胡甥王君性之收得二十五番

重加潢治來乞詩率題二章以寄柴桑之慕并高王君渭易之誼焉

明季多布衣松圓乃其一胡生有舅風卜築虞山側朝抱漢陰甕暮種元亮林天地易斜陽一身餘氣力寒花爲幽人挺此傲霜質桃李羞春華芙蓉抱秋泣惜哉松圓老先以癸未卒不及見花開同書甲子曰

我亦新安人自曾祖來虞慕彼高隱致訪迹城西隅已忘牆東字誰表處士廬寒泉莫與薦蔓草徒荒蕪何甥懷舅德遺墨搜殘餘示我廿五帖一一名公書非重名公書中有清節俱開編蠹粉落滿紙寒香鋪

顧烈婦操

烈婦姓張氏縣之洋塘人適顧景玉景玉病瘵將殤

田以買藥婦曰南咳以膳親也妾罄匱資矣景玉卒
婦自投水拯之復甦俟寇安畢闔戶雉死距夫歿纔
四日年三十有五

謂迫於貧兮而有田無田謂傷於獨兮而遺孤可撫謂敦於燕
婉兮而年三十有五匪奪志於舅姑兮匪不諒於天親吾顛倒
莫究其故兮而輕殞其身嗟吁此天地之正氣兮鍾於鄉曲之
婦人

哭朱學虛孝廉 續廩

君字玉書學虛其自號生平積學力行人無知者嘗
爲余言前母死三十年而不克葬兄夢熊贅某氏貧
不能偕婦歸以是蹙然自咎乾隆壬子舉於鄉無以
赴計偕有挾不義啖之者卻之至再辭色俱厲遍貸

于戚友得五十金謂其將備資斧君獨以葬其前母
迎兄嫂以歸于是人爭謂君真孝廉閱一載遽以病
歿年僅二十有六

學虛爾不孝順親乃棄親老父年七十賴子娛昏晨長兄闇且
弱有弟家克振胡不善自保死不可死身君始諱言疾隱匿館
比鄰剗深乃舁歸絕粒已積旬父曰是兒弱廢食恐損神母曰
饑且死藥餌錯雜陳食乃強下咽卻恐親意嗔客感襲腴理得
食病益真如倒授賊枋驅敵反入闔醫藥固不良良亦難回春
吁嗟竟死孝死孝非爲仁

學虛爾不廉名者天之寶君起強攫之蒼蒼寧不惱祿汝三百
困棄地若芻蕘錫汝百餅金委塵比秋草天不容清貧乃敢逆
富媼逕貪千載名所欲殊不小福汝既不受汝舉宜用討奪汝

祿與命償彼谿壑飽天心實靳名懲勸非顛倒修名實不祥
中孰敢矯悠悠者蒼天此理安可曉

賢者多君賢矯矯足千古愚者嗤君愚感感徒自苦譽君君不
聞嗤君君不語堂前悲風生堂下零露滑白髮雙飄蕭青燈暗
淒楚空悲黔婁婦竟乏中郎女廉士不可爲徒令爲善阻不如
利祿徒斑白效萊舞貪泉釀甘醴跼鼎列肥瘠但豐毛義養豈
必伯夷樹令名在天地骨肉竟何補寧爲紈袴兒勿作孝廉父

哭陳筠樵

臨風玉樹化飛煙香自燒殘火自煎死抱才人愁入地生違慈
母恨終天千秋未定成遺藁一第偏遲過壯年痛極爲君生妄
想標名或在大羅仙

儕輩多憐君病聾因聾轉更見其聰讀書每奪前人解笑語能

從隔座通筆帶離騷三楚氣人誇閒雅六朝風卽今文酒添蕭索冷雨西窗燭不紅

酒滿春城花滿郊狂歌豪飲海棠集浪傳溫李才名埒竟折何劉輩行交醉後能容人倨傲詩成先付我推敲回頭一把酸辛

淚灑向青天桂樹梢

簡齋先生論余兩人詩以唐之溫李相比君實爲余舅氏行故三四語及之

無情端不是才人可柰情多易損身我已自驚青鬢改君今早棄白頭親長安行李空三上短命飛花了一春吹徹山陽清夜笛人間天上共霑巾

朱孝廉操

學虛之死余旣爲詩以哭之意有未盡更撫其事援琴而鼓焉

朱孝廉何憤憤家家裹糧上京君今始悔卻縣官餽貸君五萬

錢急借計吏欣然折券去一月無公車意鄰里喧傳朱家娶婦
牽羊擔酒往賀翁媪不受孝廉前致辭阿兄贅婦家久今日備
容車從馬往迎我兄嫂阿嫂入門慙顏嚙嚙爲新婦十年今日
得見舅姑阿兄入門伏地烏烏兄非弟兄非子非丈夫弟乃爲
兄償娶婦連載拜告兄兄勿念弟貧兄念母棺殯三十年中夜
常數數起不得眠今始得貸葬緡往筮宅筮人曰許兄掘四隅
弟南負其土墓碑三尺書行人讀之云是朱孝廉母秋風淒淒
朱家屋上鵲鷗啼翁媪呼兒呼兒淚下如綆縻兄嫂戚戚促促
願以身代當其菑伏枕告父母阿兄能牽車牛阿嫂能操箕帚
勝兒脆弱不能負升斗前母在九原兒往從之代兄報罔極恩

關逢攝提格

元夕子梁飲我得登蘊玉樓呈屈婉仙夫人

逸去姮娥空桂輪沈香許踏步餘塵到來風月雙清地合住神仙一輩人姑射祇憑梅作屋瀟湘宜與竹爲鄰得參無佛蓮花座也算靈山悟後身

纔上瑤臺思渺然瓊簾疎影拜飛仙南湘騷客誇同姓東美癡人說比肩春氣煖和花蕩漾神光清鬪月嬋娟歸來三日衣香滿誤拂雲和第四絃

和子梁雨中見懷

小門深掩綠苔圓聽雨簾櫳愛獨眠二月春光昏似夢一樓山影黯如烟桃花紅淚思前度芳草青袍惜盛年難得鷗波仙伴侶娛寒親寫衍波箋

約同人修禊

春波五尺月三分春思如潮夢似雲愁逐醉來須酒解衣嫌香

浣待花熏可憐天氣清明節有感人心逸少文輪與鄰娃風格
勝親書蘭簡約前裙

泛舟三橋修禊分得亭字

雙橈十里九回停柳到三橋不斷青隙地儘開花似屋連邨齊
靠嶂爲屏過船蜂蝶穿牕活上市魚蝦出網腥西北樓高人隱
隱東南風急晝冥冥錢龍張宴圍紅裏酒虎分曹鬥綠醺偶憩
清波皆落水但依脩竹卽蘭亭右軍落筆頽山嶽左相銜杯吸
澗溟綽有六朝裙屐意都忘四座管絃聽詩脾入手牙爭慧觥
政隨心語必靈我輩處窮工作達古來常醉勝於醒更番芳信
無虛度細數韶光得半零手采吉祥香草去春衣葉葉是蘭馨

城西酒樓放歌

人生花月不常好眼前得之休草草更遲十載看青山青山應

笑吾儕老去年今日雨滿天良辰虛度癸丑年今年今日天氣
朗急須料理打雙槳三橋柳色知春深春深一刻千黃金紫駝
之峯爲我割梨花之酒爲我斟春風入骨似春酒欲醉不醉春
人心十年前曾一醉此同時酒徒有二子張和子旣得時陳樵則
死我獨胡爲復爾爾紅日摩空欲下沈楊花作雪欲上簪酒酣
更憶十年事惟有酒痕常在襟男兒墮地若飛絮落洞簾櫳偶
然遇君不見一高一低雙燕翼一深一淺桃花色明日陰晴不
可知春恨如何醉消得

牡丹

國色疑餐絳雪丹姍姍霞佩落瑤壇人中數到西施豔天下多
從北面看萬綠扶持方得勢百花羞澀盡先殘銷幃卷起春風
老有恨無情獨倚欄

題楊晉梅花卷子

耕烟入室推楊晉山水之餘及寫生帶得荆關飛動勢一枝一
榦也縱橫

不多幾筆看疑麤中有詩情楮墨餘讀到橫斜水清淺始知花
影只宜疎

題扇

月光到地白於雪花氣上天香作雲如此乾坤如此夜不知何
處著塵氛

梅谿茅旦三峽圖卷子

開卷猿聲滿人耳行路之難盡於此何時聳身青天上橫掃瞿
唐一千里一波掀騰似山起兩崖嶙峋出江底壁面仰射日月
迴硤角俯瞰鼉鼉徙行舟穿峽峽穿天百曲千盤爭尺咫丹梯

一綫越鳥渡一墜雲中判生死行役到此心膽裂畫師顛倒益
自喜奇險更在筆墨外塞乾裂坤半張紙平生嗜奇出至情足
蹟未到夢所經麝香山頭彩雲落魚復浦前銅鼓鳴丈夫遠到
萬里輕奇思力與江山爭卷還巴峽兼天浪門外長江春水生

蓮花勸酒歌

有酒不飲君奈何荷花一一朱顏酡似開笑口來勸酒荷葉便
作金叵羅千枝萬枝淨如拭婀娜天然去雕飾倒影山光不敢
青映波曉日都無色吹來花氣熏詩腸一字未成心已香三十
六觥不引滿花殊笑我非清狂酒半尋花與花語不合天生吾
與汝藕絲情緒太纏綿蓮子清虛太心苦花聞人言若有知一
時齊放同心枝但看春色韶華短已感秋風搖落遲願君盡醉
休歸去夜深只在花間住月黑纔知香氣通露涼自有紅衣護

櫂舟更復向中流中流蓮花過人頭只將荷葉爲明鏡莫使清波照見愁

集飲李家池上

花四圍酒中央主賓無言各盡觴一池花一壘酒花到手時酒到口花枝易落落復開酒香易竭竭更醉惟有人生不常好對酒看花休草草當時酒徒陳筠與王雲酣嬉顛倒醉百場鮑家季子淵獨後出吞海意氣非尋常造物忌才尤忌狂兩爲異物一異鄉不畏饑驅不怖死吾輩吟顛復如此頻年荒歉皆由天斗米幾及五百錢花枝縱好無酒筵有酒亦無諸少年卻憶豐年恣揮霍酒滿鄉邨米填郭人與飛花一樣顛春風扶上城西閣前遊歷歷怕思量欲歸不歸且一觴道上相逢少年客不是當時舊酒狂

吳硯史待詔

秦階

袁筠亭學博

斯麟

蔣瘦吟上舍

繼州

招同竹橋丈以下十一人供花設醴爲消暑之會卽

席放歌

門外紅塵三十丈門內蓮花三百盎名士心如古佛心只受人
間花供養主人愛客客盡來客愛看花花盡開花光團作雲五
色此屋便是真蓬萊花不在奇不在幻無一雷同耐人看祇覺
清風透體香不知花氣霑人汗一客一几行一觴一十四座分
兩行花知人意卻在酒一瓣飛入杯中藏請君自奪杯中彩花
在杯中久相待一搗不得一大白第十四杯花宛在衆賓陶然
主灑然請以拇戰終此筵自慙小戶難應敵聊向壁上張空拳
須臾安上銀鐙白滿堂盡作頗黎色賓主相看醉似泥只有花
枝醒時識當筵起舞花亂飛花聞酒氣霑人衣勸人更盡一杯

酒明日花顏恐已非我感花情添懊惱三十年華尙潦倒要待
功成始拂衣只恐花枝笑人老人生難得是閒身故里新知情
更親此身一入長安道不是看花飲酒人

蘭花

玉魴偏開暑月中小窗相對雪玲瓏饒君縱有真香色輸與荷
花十里紅

空谷休誇竟體芳近來閨閣愛時妝水晶簾下盤龍髻只插珠
蘭茉莉香

有贈

清夢太紛紛蓮花疑是君一天秋在水萬綠曉爲雲畫楫愁難
渡簫聲不可聞相思與明月流照大江濱

我思

離君纔十日無夢得離君明月都成水梅花半是雲潮痕思鏡
影蘭氣想衣熏願化雙蝴蝶分飛六幅裙

姪婦謝氏歸自清風涇饋雪瓜廿枚

吾家有道蘊能詠白雪香歸來及瓜期載瓜盈輕航貽我二十
枚結束兩布囊大者狀若髑細瑣尤尋常燈前競傳看任手輕
低昂小女急索解脰聲裂篋當啍啍棄之走雪白顏無光主人
苦吻渴一嚮聊取嘗入口若無物但覺津液灑過喉始知妙化
作冰雪腸餘甘回齒頰六月嶰山霜又如哀家梨渣滓都已忘
上環噉肉盡皮膜猶甘芳一枚意未愜妻孥睨其旁更抱兩枚
進舉座爭截肪須臾空几案餘者紛拏藏別索他種繼火齊含
丹房食之非不甘嚙液須遺瓢求甘不求鮮何似食蔗饴得此
凡品奪勝啜雲英漿飽噉暑疾愈願天災無涼急須饋親弗恐

抱荆璞傷皮相失佳士俗弊能勿防請爲曹邱生先導以短章

畫蘭

離騷一種舊根苗湘水湘雲綠共搖認取春風雙影子不聞花氣也覓消

七夕詞

羣山萬壑墨雲遮大樹摧枯小樹斜我愛虛堂涼似水江鄉愁殺木棉花

試硯齋

主人愛硯如愛客硯與主人分半席溫然入手煖如春終日摩挲不能釋石骨雖剛柔在理喻靡觸之無不靡抱來紫玉欲成煙浴罷昭儀那濡水貯以綠天災以芸硯亦洎躍爲策勛乃知物必聚所好馮煖所以歸田文

白玉環歌

白玉碾作環宛轉同心結願得兩條心纏絲無斷絕一解將環
比明月明月不常圓將環比明鏡明鏡無雙連二解郎比玉情
溫儂比玉光潔潔非悅世姿溫豈因人熱三解搥玉作半環爲
郎繫銷絲搥環作玉屑與郎和金膏四解某年月日時毀者玉
之命百千萬億秋不毀玉之性五解精神還洪爐英華挺山川
天長復地久依舊雙玉環六解

小遊仙

彩雲飛過石無痕亂積桃花礙洞門不道玉妃幽閉久聽人小
謫也消寬

金闕西廂鎖玉扉自將秀色療朝饑冲霄那用真僊骨舐着劉
安藥便飛

黃書捧出紫宸班
軋軋龍車下九關
卻喜瑤宮諸女伴
更無一箇到人間

生長蓬山腳下居
何曾禁錄事清虛
閒來自喫桃花飽
冷笑先生讀道書

脫籍天魔入道遲
一篇真誥讀支離
偶來偷看人間字
開卷之無便詫奇

海上神山數點塵
飛僊驚避入青旻
三千配合童男女
從此瀛洲盡俗人

哭陳石泉

去歲學虛死今年喪石泉
皇天不佑善所失必其賢
共有衰親在誰將獨行傳
明年莫秋節宿草又淒然

少日航遊俠朱家
郭解風雙鉤秋水劒
五石鐵胎弓天地身何

補妻孥慮已空年來道書讀智計轉沈雄

市亦有奇士聊爲服賈勞但能供結客不屑計秋豪一笑空諸券千金付汝曹男兒何不可齷齪是錢刀

家業飄零盡蕭然且學仙言尋大禹穴直闢洞中天書竊靈威寶花探玉井蓮葛陂龍化去遺蛻自千年

學劍終休矣神仙不可期蒼生能汝活黃帝是吾師瀟灑煙霞理艱難菽水資出來黃叔度世業在牛醫

家在魚鹽裏而如在遠林腥風吹市口蘭氣出君心滄海珠仍耀中天月不沈紛紛高隱輩徒計買山深

我師君道義君愛我文章江漢雙流合芝蘭一氣香丹燒隱湖月嘯落劍門霜從此瑤琴碎春風莫再狂

昨過君家裏空堂總帳飄青燈一棺漆白髮兩行潮蘿帶吹山

鬼松風作大招腰間季札劍閉久鐵花銷

玉峯寒夜與百堂子山

霜肅晴皋夜氣醒西風吹我片雲停一燈紅豆花如笑對語青天月可聽葉影蕭疎癖病木雁聲淒緊下寒汀與君人海茫茫立細數遙空幾箇星

送竈詞

竈君今日朝天去愧乏黃羊作餞筵白酒上供煩老婦紅燈相迓待新年荒城米粟偏如土寒士文章不值錢那用塗糟醉司命此生無事敢瞞天

海禺樂府

兒代死

哀虞孝子宗濟也附見明史二百九十六卷孝義周

琬傳

黃巖孝子親戍邊廣濟義民兄不全挺身代死不曰代人則自
完首自碎徭役至重民命輕敢以一死易二生有兄事父兄事
祖求仁得仁復何苦

禦燕議

遼黃給事鉞也傳見明史一百四十三卷

俊不俊鐵甕城高守誰任善徒善兵至江南禦已晚幕中兩言
實要圖惜哉正學忠有餘國門開里門閉召者來行者斃死難
死溺同此身不以名節累所親當時慷慨幕中客十族一區同
白骨

鬼嘯壁

惻蔣御史欽也傳見明史一百八十八卷

人處明鬼處暗人有禍幾鬼先瞰鬼處暗人處明鬼惟求食人求仁願與龍逢比干遊地下不願與賊並世生緘默負國卽負親生知爲孝爲忠臣疏草屬鬼夜哭閣筆思聲益悲奮筆疾書死卽死四壁鬼聲寂然止

臣易言

嘉陳侍御察也傳見明史二百三卷

銷衣小兒大獄掀臣察不言臣言言能指佞指不朽叶臣軀不如言一指願以不賢易賢死帝目察光若炬衆目帝色如土臣察不知昧死語歸家搗管自補牘請以一指爲言續

尙湖門

傷錢參政泮也附見明史二百九十卷忠義王鈇傳父骨賊火殺賊不可生不殺賊死尙湖水一區不能洗我恥賢

縣尹憤民命賢孝子憤親親耆長數人艇數十明月刀光同一
色身被數鎗殺三賊我自報親尹報國噫噓欲內賊柄用外賊
焚東南倭寇徒紛紛皂林更有宗將軍宗禮亦常熟人官遊擊從阮鶚擊徐海戰死皂
林贈都督同知諡忠壯明史胡宗憲傳

腊潰肉

詠趙侍郎用賢也傳見明史二百二十九卷

一疏六十杖敗肉落如掌趙家塊肉作家教匪以示忠實示孝
相公去留誠可商國危主少關存亡大臣知爲社稷計小臣祇
識綱常字君不見墨纓司馬黃扉升當時藉口張江陵趙家祖
武孫能繩

獄生芝

悼顧副使大章也傳見明史二百四十四卷

鎮撫獄中德星萃黃芝奕奕應其瑞一人入一辦苗六辦畢六人集五人慘死一人在急移法司正其罪爰書之定在一身敢以自誣誣五人此身已辦一死久不可更落獄卒手嗟哉芝生獄中胡不化作指佞草直指茹花滿地紅

桂林守

哭瞿留守式耜也傳見明史二百八十卷

桂林城高全粵首王不能守臣請守臣下泣臣實願王死社稷王下泣王始知臣守城力榕江失戍嚴關通城中蕩蕩如天空守臣頸血濺守土去此一步無死所正氣化作空中雷天亦爲公淚如雨桂林守守不得內有五虎伺君側外十三鎮爭爲賊以守責守豈守責臣惟一死自報國烏虜有明一代二百七十年留守一死全局完桂林高句高不可攀一峯獨秀如匡山

自題第一情天閣

獨立此樓上情天一笑空千春流水裹萬象落花中夢與星辰
會情如河漢通相思無日夜和月轉鴻濛

除夕獨往招真治尋梅

六街人語似春雷行蟻游魚逐隊來世上清閒偏有對一詩人
與一寒梅

天真閣集卷八終